

四庫全書

集部

欽定四庫全書

集部

范太史集卷九至十二

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷九

宋 范祖禹 撰

表

賀升許州為潁昌府并德音表

以下代王
樂道侍讀

伏覩某月日勅命升許州為潁昌府今月某日德音赦
潁昌府管內徒罪以下并蠲放秋稅進士免解賜耆老
粟帛祭山川祠廟者太嶽舊封伊昔建旄之地黃圖近
輔惟時啓聖之基爰錫嘉名特開新府上奉祖宗之慶

俯慰臣民之心當展顧懷寰區并蹈臣竊以帝堯光宅
肇發於唐邦孝文纂承越從於代邛然未有邇王畿而
夾輔固宗子之維城遂升明兩之輝以久太平之運珍
圖大定景命有融考濬哲之勃興在冊書而絕擬恭惟
皇帝陛下大明出震盛德統天丕承五聖之休高視百
王之表惟英考御圖之始席仁皇累洽之期陛下天授
至神地居上嗣溫文夙茂淵懿日躋於時特隆主器之
儀初被撫軍之寄疏封東土仗鉞南邦允當四海之宅

心奉答皇天之眷命旋膺帝典登踐諸闡歷數在躬謳
歌歸啓運屬離明之盛歲踰星紀之周命式九圍光被
四表乃眷興王之舊聿懷追孝之誠冠潁府之大名即
許昌之故號合為美稱用協休祥明命惟新鴻恩下霈
宥罪寬賦招亡禮神甄錄賢能優恤耆老神祇共喜動
植交歡況臣被遇青宮觀光朱邸潛躍之始攀附最先
仰麗澤之渥加與羣黎而同慶阻預稱觴之列徒傾就
日之誠榮幸之私倍萬倫等

謝傳宣撫問表

今日日入內侍省內東頭供奉官某乙至西京伏蒙
聖慈以大行太皇太后山陵并祔葬事臣幹治悉已辦
集傳宣撫問并賜臣茶一銀合者先后在方飭尊崇
之禮尸臣謹職特加撫諭之恩拜以受言感如挾纊恭
惟皇帝陛下德齊天地孝格神明銜罔極之深哀嚴送
終之大事瞻原陵而感慕知臣子之勤勞臨遣使輶俯
傳天問念違離之歲久憐衰朽之力殫載聽絲言如親

咫尺乃頒茗飲俾滌冥煩況臣早翊儲闈今司宮鑰夙
夜匪懈惟知勉效於公忠日月有明敢謂特迴於私照
益當盡瘁仰答見知

謝山陵禮畢表

今月十日慈聖光獻太皇太后山陵禮畢者雲收仙馭
從列祖之威神天作崇丘與厚坤而長久克終襄事幸
免瘞官伏以先后扶持保佑之功邦家永賴陛下報復
尊崇之志典禮極隆申詔有司恪共大事嗟上賓之遽

遠迫同軌之屆期臣夙夜在公寢食俱廢猶懼不及豈敢遑寧資羣吏之鳩功致多儀之肅給此蓋伏遇皇帝陛下大孝格於天地至行感於神明遐邇一心中外畢力靈祇幽贊先寢永寧曲全守土之臣俾逃曠職之咎臣荷恩實厚居守方遙無任瞻天望聖激切屏營之至

祔葬禮畢謝表

今月十日濮安懿王二夫人祔葬禮畢者寢園祔卜真宅言歸克成三板之封永閔六珈之服訖無曠失苟違

謹訶臣竊以濮王二夫人福慶所基音容久翳未備葬
禮實軫聖情因展事於橋山俾制儀於藩國二役並作
庶功實繁迫先遠之屆期幸烝徒之克集此蓋伏遇皇
帝陛下孝嚴宗廟敦睦懿親追遠以厚生民送終以當
大事禮儀悉備兆宅以安上承英考之聖靈永慰濮園
之泉壤惟庀司之官守免獲戾於簡書臣分職留都阻
覲宸闕無任瞻天望聖激切屏營之至

謝宣賜銀絹表

伏準宣命以臣修奉慈聖光獻太皇太后山陵了畢賜臣銀一百五十兩絹一百五十疋者橋山展事曾無述職之能宸宸頒恩猥被賞勞之典載自惟省深積覲慚臣聞以庸制祿則下不覬覦先事後得則人無僥幸故功大者其禮厚力勤者其報優授受靡虛勸沮斯在伏自軒宮掩耀宸極纏哀四海遏音共奉宅憂之政萬邦同軌恪承送往之儀而臣居守都畿典司陵寢固當上體聖孝祇率官常竭臣子之至情奉邦國之大事庀徒

僅集卜兆克成皆上稟於睿謨實俯資於衆力凡居執
事敢憚服勤至於道路所經次舍之設唯懼不供之獲
罪豈謂有勞而可書錫外府之貢金加丘園之賁帛顧
茲忝冒深切兢惶此蓋伏遇皇帝陛下大孝格天至仁
育物使人不求其備序情而閔其勞上嚴聖后之喪內
盡神孫之志務從優厚以稱尊崇顧無補於涓埃亦預
霑於寵賚雖賞之寧僭曲存勸善之方而受以無功豈
追伐檀之刺誓殫忠力仰答恩私

皇后賜絹謝皇帝表

雲輶遠降方展禮於因山星使俯臨遽頒恩於守土宮
庭之積私室是充祗受以還兢惶無措伏念臣典司莞
籥營奉陵園駿奔遠郊迎扈仙蹕屬母儀之屆路修官
守以在公曾無供億之勞僅免曠瘼之責已荷內朝之
大庀復叨實籙之殊恩仰戴便蕃實為僥冒此蓋伏遇
皇帝陛下教先宮壺德御家邦禮尊奉於宗祧惠曲加
於臣子體乾坤之覆載品物不遺並日月以照臨光明

下濟推恩有自論報何階冀竭愚衷少酬鴻造

謝德音表

陵寢即安甫終於大事宗祧升祔肅奉於明禋孝惻宸衷恩覃甸服詔音所被蠢類相歡恭惟皇帝陛下祇遵詒謀布昭明德極奉終之盛禮廣立愛之慈仁眷言二宅之郊爰及三城之壤陵土既復役車告休謂真馭之所游意聖靈之降格哀矜庶獄悉緩於青災甄序百工特疇其勤績賜田租於農畝蠲屋粟於經塗開釋逋逃

之辜申嚴樵採之禁恩被動植德歆神人臣等分職留
都叨司陵邑恭陪營奉幸免曠瘳已蒙寬宥於簡書更
獲究宣於睿澤感抃踊躍倍百常情

慰蜀國長公主薨表

臣某言得進奏院狀報今月十七日蜀國長公主薨謝
輟朝五日者主第纏哀天支掩秀訃傳中夏慘結輿情
伏以故蜀國長公主柔靜宜家肅雍成德鍾先朝之至
愛有賢女之令聞姆教弗煩化風自遠早築王姬之館

大開蜀土之封宜茂享於修齡永增徽於寶萼而穠華
蚤落眩藥無膠條為降渚之游遽終歸妹之祉恭惟皇
帝陛下念深同氣愛本篤親趣駕臨喪驚復衣之不返
廢朝出令極卹典以追榮况宗祧之升祔猶新昭寢之
哀思未遠重此悲惻撓夫睿神伏願推理於難堪割情
於無益上釋慈闈之悼念俯安羣下之憂惶臣掌鑰留
都違顏法坐莫由慰覲徒切悃誠

賀明堂禮畢表

饗帝報功極聖人之能事配天嚴考舉有國之盛容熙
典備成鴻恩誕布聲名所暨抃蹈攸同恭惟皇帝陛下
神智在躬至仁守位法陶唐之稽古專講於舊章放帝
嚳之執中丕冒於羣品荷三靈之眷命因四表之歡心
練日季秋戒期百執齋宮蠶獲儲精意以致虔清廟顯
嚴展孝思而入裸然後御六龍而旋軫躋五室以交神
黍稷馨香式昭於明德金石擊拊備薦於和聲辟公顯
相以在庭俟衛駿奔而率職靈心昭格景貺潄臻發大

號於中天均洪休於率土異風鼓舞允澤豐融凡在萌
生率同茂遂臣幸班持橐阻預侍祠守籥留都病嘆周
南之滯受釐宣室何階前席之榮

謝傳宣撫問賜藥差醫官表

今月一日某官某乙至西京伏蒙聖慈特賜傳宣撫問
并賜臣湯藥一銀合仍差醫官某乙看醫臣所患者王
人俯降天語遙臨頒藥品之良俾蠲除於積疾詔醫師
之屬就診療於微軀九死之餘再生可望祗荷憫卹伏

切兢惶伏念臣自領留都實殫拙力顧久尸於爵祿冀
少效於涓埃唯成周分正之郊素稱多事屬先后因山
之禮仰迫嚴期夙夜在公寢食俱廢唯知竭節且昧養
生甫及暮春已動累年之病苦載離炎暑復加百體之
疴羸寒熱交爭於肺腸瘡痂外毒於肌草精魄飛越蓋
積勞而損神視息眇繇嗟鮮食而伏枕藥餌苦口極眩
暝而弗瘳疾痛呼天迫困窮而反本輒傾血懇仰籲宸
闈豈謂皇帝陛下曲記舊臣特迴睿眷恩深覆育軫父

母唯疾之憂德過生成念犬馬至微之命遠馳星使傳
諭堯言仍分御劑之珍更委國醫之妙慈仁俯被沈瘵
復蘇顧茲望外之所加豈盡生涯之可報臣謹當專精
飲藥委命就醫儻肉骨以生存誓沒身而酬補

辭觀文殿學士正議大夫表

恩惟求舊賞乃及私聞命若驚撫躬無措伏念臣本由
孤進仰會先朝徧躋臺閣之榮詎有謀猷之補徒以樸
忠少與狷直自將當陛下潛躍之初首東朝翊護之選

回淵講學最承訪逮之私內寢問安日奉溫恭之德寢
叨誤寵進履亨衢掌右掖之贊書奉西清之密議旋升
內閣之直出領全秦之師屬景命之有開方儲闡之肇
建亟膺嚴召俾預下僚遽承英馭之賓天幸會飛龍之
撫運擢居憲府曾無報稱之能斥守輔藩曲荷保全之
力越從舊許入領大農復違去於邇顏尚保釐於西洛
守符屢易報政幾聞俄得請於別臺幸即安於私館衰
遲晚節蹭蹬十年已絕望於榮塗唯繫心於魏闕間自

淮陽之卧再司鼎邑之繁疲力已殫顏齡浸逼養生素拙多病日侵既歷三時僅存餘喘曠療斯久隕越是虞方哀籲於宸闈丐生還於里舍忽奉自天之命特加躡等之恩載自揣循實為僥冒伏望皇帝陛下至明日照洪造天垂延登俊髦慎假名器聽輟出綸之命俾安據蒞之憂况當陛下旰食九重勵精百度憲章前古董正治官曷可無功而進階豈容越次而受職輿情共駭自訟何安重念臣疾疢未瘳醫療方切實懼滿盈之咎敢

饗寵數之榮高位疾顛昔賢明戒由衷之請報可是期
謝觀文殿學士正議大夫表

渙汗難收綵言俯諭末容懇避徒積兢惶恭惟先朝經
始內殿聚典學之古訓延備問之宗儒擇人甚難其職
多闕必踐二府乃居此官未有賈越等夷輒假名器上
聖有作百度惟新稽古建官任人立政始定大夫之位
以易貳卿之聯諒惟考績之明乃預升階之典如臣者
識非慮遠學不知方歷事三朝叨塵二禁震闡調護慚

無羽翼之能旬服蕃宣屢被股肱之寄素甘多疾久去
近班荷大德之包容嗟微生之屯阨自膺睿旨再領留
都甫及周星半居病告危衷備列委照曲臨蒙降侍醫
俯救殘喘荐被出綸之命併加躡等之恩內揆無功敢
當誤賞雖露章之甚苦終賜禮之靡俞祇服寵榮實踰
涯分此蓋伏遇皇帝陛下布昭明德保宥羣生承英考
之烈光御寰區之泰定謂啓封之地已優復於黔黎賜
履之邦亦惠霑於動植追惟潛躍之始猶錄攀附之勤

因宗祀之休成需鴻禧而普被方敘勞於庶尹亟興念
於遺簪推穎邸之餘恩記儲宮之舊物力排羣議深簡
聖衷將特示於寵私故靡循於功次臣敢不益親醫藥
強整筋骸冀畢桑榆少酬塵霧

謝加開府判大名表

以下代韓康公

進階極品易鎮別都懇避莫遑冒榮有覲伏念臣才非
經濟識昧幾深兩塵鼎鉉之司累玷節旄之寵頃從詞
館起涖洛師迫神考之遺弓奉裕園之復土遽被中天

之命再叨朔部之行肆覲闕庭仰祈旒宸冀遂乞身之
請靡收渙汗之恩顧殘槁以何堪豈勤勞之敢憚勉祇
成命深積愧懷矧乃相印聯華天倫並列逢辰之幸曠
古莫儔此蓋伏遇皇帝陛下濬哲統天至仁浹物責成
羣后分治九圍圖任舊人特舉樞官之典奄受北國俾
修述職之勤誓竭疲駑仰酬覆育

謝太皇太后表

禮均三事寵冠文階節制諸軍任隆藩閫伏念臣早緣

末學進齒近班被遇累朝歷年四紀雖樸忠之自竭無
嘉績之可書夙聞知止之風屢有告歸之請邇者對揚
宸陛親奉德音疊貢需章特紆使節懼頻煩於睿旨敢
確守於私誠終叨將相之榮尚被腹心之寄顧循朽質
深切汗顏此蓋伏遇太皇太后陛下保育羣生照臨萬
國眷求舊物宣布上仁錫以龍光茲及臣工之品倚之
屏翰特嚴宮鑰之司唯誓糜捐以圖報稱

辭免恩命表

恩唯厚下曷可誤加賞異及勞豈容虛受伏念臣早塵
上宰出守別都愴神馭之賓天屬橋山之卜壤八荒同
軌極喪考之深哀七月戒期嚴送終之大事而臣典司
陵邑申畫畿封暨復土之克成乃居官之所職惟虞獲
戾敢謂書勞上簡聖衷誕宣庭告進陪多賦衍食真封
懔如蹈涉於冰淵敢避瀆煩於旒扆伏望皇帝陛下特
迴宸聽深亮愚誠亟收出綍之恩俾追伐檀之刺恭祈
報可詎敢飾詞

上太皇太后表

明綸薦降寵數併加義所當辭情難冒處臣向以典司
宮鑰修奉寢園竭臣子之至情嚴邦國之大恤實惟官
守非曰事功而況萬國會同百執奔走共奉因山之禮
豈繫守土之勤麗澤天垂明庭辰告益疏并賦增食爰
田夫何送往之微勞乃預報功之懋典伏望太皇太后
陛下曲迴睿聽深軫淵衷輟成命於已行慎褒章之或
過俾安愚分庶協公言

再免恩命表

記功惟厚祗寵靡遑恭布危誠未奉俞旨臣竊以慎終
追遠以敦教義之風送往事居當竭公忠之力臣備位
藩鎮服勞國家何足言功乃蒙推賞伏望皇帝陛下慎
司名器深察肺肝特寢過恩免貽公議

上太皇太后表

宸暉下濟睿澤曲加敢避瀆煩必期俞允臣竊以命書
之寵并賦之封表疏爵之隆恩繫馭臣之大柄非其分

義雖一介以難加苟有勲勞則萬鍾而可受臣職當居
守禮在奉終乃事國之所宜顧何顏而冒處伏望太皇
太后陛下俾人浮食慎賞罔功深矜惻愍之誠特輟褒
優之命

謝表

因山制禮奉神考之真游復土書勞錫尸臣之壤賦弗
容懇避唯切兢榮伏念臣席寵累朝受恩奕世義均休
戚任處蕃宣方聖寧之宅憂當臣工之走職共襄大事

咸底庶功惟殫夙夜之勤敢期日月之照此蓋伏遇皇
帝陛下奉先思孝守位以仁眷惟西屏之臣實司同軌
之會爰加懋賞特越常倫益圖報國之忠仰答念功之
賜

謝太皇太后表

命出告庭恩加守土懇辭弗獲祇受尤慚伏念臣傾蒞
別都奄承遺訓方切上賓之痛已驚先遠之臨祇率羣
司克集大事而況中外咸獻其力遐邇各致其誠豈臣

獨勞膺此異數此蓋伏遇太皇太后陛下穆清垂照睿
哲宣慈知臣子之服勤重原陵之送往贊書示寵率土
知仁誓竭精忠仰酬鴻施

北京謝上表

分正成周獲辭宮鑰偃藩全魏復總兵符祇荷寵光伏
增震悸伏念臣久塵近列仰際先朝委秉洪鈞再司上
宰一違鼎鉉累建節旄引年則過於從心報國唯知於
盡力頃從西洛入覲邇顏歷陳匪石之誠願遂歸田之

請疊膺睿旨莫奉俞音終叨袞鉞之榮重被翰垣之寄
此蓋伏遇皇帝陛下仁如天覆明與日升方庶政之始
初飭羣工而勵翼深簡股肱之舊曲加體貌之隆乃登
進於文階俾殿臨於巨屏臣敢不上體至眷乃心本朝
虔修述職之勤勉企壯猷之效誓堅晚節仰答鴻私

謝太皇太后表

保釐洛宅曾無分正之勤偃息魏藩更委居留之重方
臨舊部祇荷渥恩伏念臣被遇累朝歷年四紀秉鈞宰

席再塵上衮之司授鉞齋壇荐忝元戎之寄唯樸忠而
許國無敏智以過人顧迫殘年久司厚祿未遂乞身之
請復膺渙汗之恩此蓋伏遇太皇太后陛下懋建大功
敷求至治仁惟圖舊道在宣慈眷朔野之輿區為浚都
之巨屏洪流蕩析生齒墊昏郭郭阡危耕桑失隸責老
臣之綏輯分聖寧之憂勤特加三事之宜俾修連帥之
職臣敢不恪恭夙夜強勉事為庶圖毫髮之功上答乾
坤之施

范太史集卷九

欽定四庫全書

范太史集卷十

宋 范祖禹 撰

表狀

賡功德疏右語附

求退第一表

以下代文潞公

竊以不能者止蓋量力以效忠有疾則辭豈愛身而避
事輒殫悃悞上冒高明伏念臣學古迂疎受材淺薄惟
不欺而行已敢有志於濟時徒以辱先朝過聽之知荷
陛下非常之眷越從散地擢處近司雖智力之已窮諒

毫分之無補屬嬰哀病累涉旬時沈綿幾及於膏肓羸瘠僅存於皮骨桑榆向暮藥物難瘳未知朝謁之何期唯恐顛躋之無日千鍾賦祿豈高卧而可當三事列居非養痾之所處夙宵興念惕厲匪寧何待人言固當自省伏望皇帝陛下仁深惻隱明燭幽微曲成萬物之宜不奪匹夫之守使其全進退之義察其無矯激之心早賜允俞俾遂安養伏乞除臣宮觀差遣一任下情上達必冀於感通人欲天從誓期於得請

二

忱辭仰請初冀於必從溫詔報聞敢煩於曲諭荷并容
之至廣增危懼以彌深再瀝由衷仰祈垂鑒伏念臣少
而志學出則事君豈徒干祿以代耕顧已委身而許國
竊欲粗行其志庶幾有補於時在畎畝以無忘矧廟堂
之或處自陪機政思竭愚忠蓋欲知無不為期於死而
後已儻非疹疾敢就便安蒙賜告之恩已將彌月在具
瞻之位曷可瘵官久處公居坐尸厚祿豈敢慕名而自

潔蓋惟揣分以難安伏望皇帝陛下感動至仁哀矜舊物迴大明之久照察一介之微誠賜以殘年全其素守使得上還重任退即散僚則臣永荷生成之恩猶圖隕越之報

三

疾難自力蓋將止於不能聽未及卑尚莫從其所欲敢避再三之瀆終期開可之私臣伏自學古以入官常欲捐軀而報國在下位猶將竭力備輔臣豈敢憚為所惜

者難際之時所處者可行之地初心未遂羸疾已侵強力外殫疲神內竭革膚日削食飲至微顧此形骸已臨溝壑况復眷存特厚禮貌加隆累降侍醫頻煩詔使垂天地大生之德軫父母惟疾之憂展轉伏思戰兢無所非不欲力圖報塞勉就痊除而勿藥難期造朝曷日所以懇祈引避實不遑寧伏望皇帝陛下深諒至誠曲加大惠察臣力小而任重閔臣福過而災生處以閒官俾安拙分肉骨之賜沒身敢忘俞允為期屏伏以俟

再求退第一表

竊以論道經邦惟人乃可以勝其任陳力就列不能曷
可以強其為輒瀝愚誠上千天聽伏念臣久安散地寢
迫頽齡猥以薄才遽當大任伏遇陛下恭默思道垂拱
仰成圖庶政之惟藉登衆賢而共濟臣脩位上宰總率
羣司而嬰疾三時卧家累月虧君臣之至敬損著定之
常儀每自省循不遑啓處威顏咫尺莫伸下拜之勤病
骨支離猶貪攘臂之祿復以足瘍為梗步履益艱賜告

滋多在公幾廢不惟非養疾之所亦恐違責任之宜豈
可瘵官猶將卒歲伏望皇帝陛下曲垂昭鑒深惻至仁
閔枯枿之逢春榮華無幾哀疲駑之盡力驅策何堪特
解近司俾安散秩儻未填於溝壑猶圖報於毫分

二

囊封有請恭布悃誠綸旨載頒曲垂訓諭荷眷存之至
厚增惕厲以彌深敢避瀆煩必祈開可臣伏以君為元
首臣作股肱休戚所均逸勤胥共既委身而許國敢避

事而貪生況臣親逢難際之時道在可行之地豈不欲
久安祿位益勉事功而力不逮心事將違願嬰纏多病
困阨百罹舊瘡未平新瘍復潰形骸若是溝壑可虞豈
可猶居三吏之崇徒竊千鍾之廩廟堂之上乃處病夫
軒冕之榮仍加槁質實恐累國誠非愛身伏望皇帝陛
下洪造曲成至明委照闕
俾全進退
之宜特示始終之賜上還相印退即里居則臣永荷更
生之恩敢忘九殞之報

三

臣以久嬰沈疾累貢危誠

聞

頻煩睿

旨尚閔俞音義不遑安言非獲已臣竊以上宰之任大
君是毗師長百僚儀刑近列巨川舟楫將濟艱危大厦
棟梁豈容撓弱當靖共於夙夜以帥正於朝廷而臣受
命以來半居病告造朝之際每損國容復歸卧家又已
踰月革膚益削喘息僅存僅勉強以能支必疲羸之愈
甚內則萬目所視外則四夷所聞豈可尚備冢司猶尸

重祿邇者合宮歲事百執駿奔既免侍祠又違宿衛端
居公館阻受釐宣室之朝近望闕庭有卧病周南之滯
今明禋已事率土蒙禧是愚臣可去之秋况拙疾無瘳
之日敢祈避位庶免曠官伏望皇帝陛下深諒至誠曲
加大惠察臣力小而任重閔臣福過而災生使之弛負
擔於秉鈞專精神於救藥退安散地以盡餘齡瀝懇叩
閣期於得請

賀太皇太后受冊表

報功文母奉冊東朝書軌所臻人祇交慶伏惟太皇太后陛下天臨萬國坤載羣生濟皇業之艱難佑聖圖於久大號令之動淵默而雷聲德澤之流雲行而雨施幽遐鼓舞跂喙涵濡惟時盛典之行曷稱難名之烈至乃預抑徽稱之請退避外朝之居躬大禹之勞謙體文王之寅畏爰諏穀旦率籲歡心百辟造庭九奏備樂載揚丕冊祇上鴻名同傾就日之瞻共祝後天之祉騰頌聲於四表翔休氣於九清

賀皇太后受冊表

涓選休辰誕揚鴻冊書文所暨岳抃攸同伏惟皇太后
殿下儷極先朝母儀萬國褱衣揄狄奉宗廟之烝嘗卷
耳葛覃首周南之風化布宣陰教保定皇家莫隆帝母
之尊爰備天秩之禮羣后在位六樂充庭祗率歡心奉
將容典體坤元而同久與聖祚以無疆臣近望宸闈親
逢華旦

賀皇帝表

東圭正宁發冊明庭三殿講儀萬方知孝伏惟皇帝陛下
穆清居位濬哲在躬聖敬日躋聰明天憲露門親學
惟先五典之從溫室問安豈止三牲之養奉東朝之慈
訓揚文母之徽音德教始於愛親神明察其事地容臺
秩禮筮史涓辰弁冕在庭笙鏞備樂金螭玉檢發揮帝
典之文揄狄禕衣炳煥軒宮之耀詠大明於周雅稽貴
母於魯經凡在羣生率同大慶

賀皇太妃牋

展儀中禁發冊外朝盛典惟行羣臣共慶伏惟皇太妃
塞淵秉德柔順承天輔佐先朝勤勞內治附寶啓軒皇
之運姜嫄興周室之基誕育聖明纂承謨烈爰膺萬乘
之養寶冠四妃之尊涓選休辰奉揚顯冊堯門協慶軒
耀增輝

賀太陽不虧表

伏覩今月一日太陽當食不食者此日而食方克謹於
明威先天不違遂仰銷於變眚伏惟皇帝陛下虔恭正

事赫奕凝圖茂馨德以感神建大中而順帝當正陽之
告朔有太史之奏占減膳法宮霈恩海寓誠心所格精
稷自通是以靈雨夕流清風旦發三辰澄煥萬物昭蘇
光明不虧夷夏咸覩昔者商宗祇畏享國百年宋景憂
勤退星三舍穹高鑒德今古同符臣親覩殊祥限守留
鑰莫由慶覲徒切歡呼

謝賜六典表

伏蒙聖慈特賜臣六典一部者上聖有作百度惟新稽

古建官任人立政將憲章於周典爰考正於唐文眷惟
當世之宜必視後王之法頒於列位延及守藩俾私室
之受藏仰慈宸之訓迪披觀敢怠紬繹知榮

慰圻殿櫝表

元豐三年二月

伏審今月三日大行太皇太后圻殿櫝者大事請期西
階啓殯慈顏寢遠真馭不留恭惟皇帝陛下號慕難居
孝思罔極凡在臣庶同切憂惶伏望少抑睿懷俯遵經
制上嚴宗廟下庇生民臣夙奉春宮遠司留鑰阻趨慰

列倍切常情

慰發引表

伏審今月二十日大行太皇太后靈駕發引者鳳翼啓
行龍輶肅駕適臨祖載尤切攀號恭惟皇帝陛下孝性
自天哀情過禮痛真游之不返瞻內寢以如存中外之
心追慕同切臣阻陪班慰但極涕零

留司慰發引表

伏承今月二十日大行太皇太后靈駕奄及發引恭惟

皇帝陛下攀號摧咽聖情難居臣等伏限官守不獲奔
赴闕庭無任殞越之至

又留司慰皇太后表

伏審今月二十日大行太皇太后靈駕奄及發引恭惟
皇太后殿下攀慕摧咽聖情難居臣等伏限官守不獲
奔詣宮庭無任殞越之至

靈駕至西京慰皇后牋

伏覩今日大行太皇太后靈駕已至西京境內者恭

惟皇后殿下遠違鳳闕祇護龍輜俯臨洛宅之郊即次
橋山之邑追攀罔極哀慕難任臣居守封畿奔迎道路
無任悲殞之至

又留司慰牋

伏覩今日日大行太皇太后靈駕已至西京境內者恭
惟皇后殿下躬御雲輶遠護仙蹕將奉安於昭寢爰俯
次於洛郊哀慕惟深孝誠罔極臣等恪居官守迎奉道
涂無任悲殞之至

靈駕到陵慰皇后牋

伏覩今月日大行太皇太后靈駕已至永昭陵下宮伏
惟皇后殿下配位宸極嚴事宗祧祗率六宮遠護仙駕
奉安甫通哀慕難居臣以職事奔赴山陵無任悲殞之
至

又留司慰牋

伏覩今月日大行太皇太后靈駕已至永昭陵下宮伏
惟皇后殿下遠違椒掖嚴奉梓宮上體聖懷倍深哀慕

臣等各以職事祇赴山陵無任悲殞之至

進皇后禮物狀

具銜臣某某物右謹隨狀上進冒瀆尊嚴臣無任惶懼
激切之至謹進

謝皇后回賜狀

具銜臣某右臣伏蒙皇后殿下特遣中使賜臣某物若
干臣無任感荷激切之至謹具狀奏謝以聞謹奏

慰掩皇堂表

伏覲今月十日永昭陵奉安慈聖光獻太皇太后梓宮
禮畢者橋山既祔永追先帝之游蒼野不還深結溥天
之痛伏惟皇帝陛下深居恭默西顧哀號想真馭以如
疑慨慈闈之杳隔臣駿奔陵寢祇奉典司慰覲無由憂
惶徒切

又留司慰表

伏覲今月十日永昭陵奉安慈聖光獻太皇太后梓宮
禮畢恭惟皇帝陛下攀慕摧咽聖情難居臣等伏限官

守不獲奔赴闕庭無任隕越之至

留司慰皇太后表

伏覩今月十日永昭陵奉安慈聖光獻太皇太后梓宮
禮畢恭惟皇太后殿下攀慕摧咽聖情難居臣等伏限
官守不獲奔詣闕庭無任隕越之至

掩皇堂畢慰皇后牋

伏覩今月十日永昭陵奉安慈聖光獻太皇太后梓宮
禮畢伏惟皇后殿下奉先盡禮送往增哀大事甫終孝

誠備至臣以職事祇從行宮無任隕越之至

又留司慰牋

伏覩今月十日永昭陵奉安慈聖光獻太皇太后梓宮禮畢伏惟皇后殿下哀深送往號慕難居臣等各以職事陪從行宮無任悲隕之至

慰祔廟表

三月

伏審今月十九日慈聖光獻太皇太后神主祔廟禮畢者金輅徐還玉衣長掩從昭陵之劍履合清廟之樽彝

恭惟皇帝陛下聖感難居孝思罔極音容永遠虛朝夕
之間安饗祀有嚴惟春秋之匪懈伏願順禮之變節哀
以時調護清躬導迎協氣仰副神祇之望俯安億兆之
心臣居守都畿馳情軒闥阻伸慰覲徒切憂思

又留司慰表

伏審今月十九日嚴奉慈聖光獻太皇太后神主升祔
清廟禮畢恭惟皇帝陛下攀慕摧咽聖情難居臣某等
伏限官守不獲奔赴闕庭無任隕越之至

慰皇太后表

伏審今月十九日嚴奉慈聖光獻太皇太后神主升祔清廟禮畢恭惟皇太后殿下攀慕摧咽聖情難居臣等伏限官守不獲奔詣宮庭無任隕越之至

同天節功德疏右語

右伏以朱火司辰薰風育物月紀正陽之德天開甲觀之祥罄海宇以傾心望帝宸而獻祝恭集祗園之侶並翻貝葉之文憑覺力之雄深薦福田之廣大伏冀乾坤

長久等睿筭以無疆日月照臨與皇明而不息永居大寶丕冒羣生

留司賀同天節表

伏以炎帝執衡時司大夏斗樞繞電天發殊祥當元聖之挺生叶千齡之盛際鴻明繼照景祚無疆罄率土以傾心效華封而獻祝恭惟皇帝陛下誠明天縱濬哲日躋丕承五聖之基翕受三靈之貺惟正陽之紀月乃甲觀之誕辰玉帛會朝梯航納貢臣等謬塵通籍分守留

都就日望雲阻預在庭之列後天絙月徒傾祝壽之誠

同天節功德疏右語

伏以帝出膺期虹流紀節茂對當千之運於昭時萬之
祥敢率懽悰仰依覺蔭誦金言之祕密瞻玉相之妙嚴
總集勝因虔申久禱伏冀壽山高聳長居當極之尊慧
日增光永庇含生之品叢欣萃祝倍萬常倫

留司百官謝賜冬衣表

伏蒙聖慈各賜冬衣者清風戒候方秋律之正中賁帛

表恩俾冬裘之預備顧惟虛受實切覲顏恭惟皇帝陛下洪覆萬方寵綏黎姓垂裳而聽海內之治求衣而念天下之寒申敕有司時頒列位出大盈之委積均麗澤以霑流豈曰無衣詎有秦人之賦何以卒歲皆同豳國之歌惟誓捐軀以圖報效

留司賀明堂禮畢表

伏審今月二十二日明堂禮畢者展采合宮薦德馨於上帝因嚴聖考廣孝治於多方大事熙成鴻恩普被書

文所混岳抃欣同恭惟皇帝陛下則效乾坤憲章古昔
神化覃於無外至治格於太寧規恢五聖之基誕受三
靈之貺若祇舊典亟嚴上儀涓吉季秋戒期百執告虔
清廟肆饗總章邁豆苾芬薦四時之和氣玉帛奔走同
萬國之歡心坐宣室以延釐御端闡而需澤騰頌聲於
海寓塞休氣於穹旻凡在萌生率均茂遂臣等獲班寬
詔幸覲昌辰屬拘掌鑰之嚴阻預稱觴之末

范太史集卷十

欽定四庫全書

范太史集卷十一

宋 范祖禹 撰

表

西京謝上表

以下代文潞公

偃藩全魏獲解兵符分正成周復司宮鑰祇荷寵渥伏
切兢營伏念臣被遇三朝秉均二府任極代天之重才
無經國之能辱體貌之兼隆竭涓埃而何補頃從踐土
往鎮北門俾總護於將壇遂七周於星紀自越從心之

歲累輸乞骨之誠疊奉宸章莫迴睿聽比膺召節入對
通顏奉陪宗祀之儀克謹駿奔之職忽奉告庭之命復
乖謝事之期進秩上公居留西土拜封章而懇避祈印
節以並還靡收絕等之恩終莅撫封之政此蓋伏遇皇
帝陛下至仁守位大德記功責實衆賢深矜舊物改容
加禮將申勸於臣鄰佚老示慈許漸還於里舍曲全終
始尚委蕃宣臣敢不上體眷懷乃心王室勉企壯猷之
效粗修述職之勤冀畢餘年仰酬洪造

謝加食邑實封表

慈仁圖舊慶典策勲祇服寵私交深榮憐伏念臣早塵
異選進履亨衢誤膺仁祖之知擢處冢司之任洪惟英
考命自帝庭仰當付畀之心俯協謳歌之望登儲有請
實為輔相之宜衛社竭勞敢期爵賞之報荷皇明之燭
隱頒天詔以褒功仍稽進律之文亟發告庭之號節旄
並建井賦兼增幸獲遂於懇辭猶曲加於麗澤此蓋伏
遇皇帝陛下懋昭明德祇適詒謀永懷追孝於前文故

特眷求於舊物功慙丙吉增大博陽之封寵越韓侯奄
開北國之土誓竭糜捐之節仰酬覆育之仁

謝男安道授承事郎表

公朝懋賞私室叨榮懇避無從感抃茲極伏念臣早塵
列爵幸克有家服采先朝備位上宰奉詢謀於大議同
登翊於元儲何圖神聖之知荐被褒嘉之典甄收弱息
齒預周行篤前勲而不忘慙舊德之可食此蓋伏遇皇
帝陛下睿明稽古信厚記功俯覃及幼之恩敷錫馭臣

之福賞延於世既祇服於寵私仕教之忠誓共期於報
塞

謝賜詩序表

宸眷俯臨天言誕布拜受之始服寵若驚臣聞昔者帝
舜作歌申勅天命推功臣下爰及股肱臯陶拜手颺言
其事周之成王諸侯助祭遣之於廟亦歌臣工列於詩
書著為典訓而未有褒優黃髮甄敘舊勲昭神祖之明
述文考之志然則聖作之美獨冠古今必得鴻儒碩學

之臣序而紀之天旨示慈輔臣奉命復頒溫詔賜以表
恩榮遇之極曠古莫比顧臣無狀何以克堪此蓋伏遇
皇帝陛下神質天縱聖學日躋制作參於造化惠澤涵
於動植以臣被遇三朝服勞四紀簡在宸宇錄其涓埃
體貌過隆宴犒加等親紆睿藻寵其行役竊惟聖哲之
言賁越風雅當傳示永久與天無極今序述之作又所
以宣昭發揚譬如日月之光捧以卿雲之氣璧琮之采
薦以繅藉之輝蓋將聳勸於後來豈獨照臨於私室謹

當刻之金石傳之子孫對揚洪休焜耀朽質非常之寶
居有神物之護持不世之恩誓畢微生而報效

進御製詩碑狀

睿藻惟新鐫功甫畢非特一時之寵乃為萬世之傳在
臣之榮何以過此伏惟皇帝陛下聰明文思齊聖廣淵
言成典謨體備風雅雖天文下照萬物咸覩方冊所載
億祀不刊然臣受藏寶章負荷聖訓唯刻金石可圖永
久末學淺陋無能敷述蒙被恩光不勝感遇謹為之記

附於其下詔書詩序別刊琬琰凡為二碑立之私室家廟之右御書閣下榮及祖考傳之子孫顧茲異渥曷以報稱唯殫忠力仰答鴻造其刊石摹本謹隨狀上進

留司慰太皇太后小祥表

伏審今月二十日慈聖光獻太皇太后小祥者坤儀永謝天序不停奄及諱辰俯臨祥祭伏惟皇帝陛下孝誠罔極聖感難居瞻風木以興悲嘆隙駒之倏過練冠始御勉遵禮制之文廟祐猶新哀薦時思之享凡在臣庶

同切憂惶臣等伏限官守不獲奔詣闕庭無任云云

乞致仕第一表

黃髮殘年過忝公主之貴成周京邑猶司宮鑰之嚴仰
祈從欲之仁俯遂乞身之請伏念臣頃居朔部累貢需
章雖備列於危宗尚莫迴於宸聽寵祿既極筋骸益衰
將耄及以無堪顧職思而難勉况聖朝念老賢相辭榮
如臣之年謝事已久輒復闕於前懇冀獲保於餘生伏
望皇帝陛下深軫睿慈矜矜舊物全其終始許以歸休

庶偃息於故廬少優游於聖日未就溝壑敢忘朝廷

謝遣中使賜詔不允表

使輶傳命宸檢頒恩荷異寵之眷存撫微躬而榮懼引
年有請顧未遂於私誠伏老推慈冀終迴於睿聽普竭
衰殘之力仰酬覆幬之仁

乞致仕第二表

危衷上列高聽未迴仍頒深厚之訓言重荷褒優之寵
數敢再殫於愚懇冀終奉於俞音伏念臣猥以薄材謬

當大任備將相踰於三紀竊名器冠於羣臣仕以易農
望豈及此內自循省實已滿盈爰從累歲以來荐有乞
骸之請宸聰屢瀆私志莫從既久越於常期復將加於
耄齒犬馬之力雖戀於主恩乾坤之仁宜息於老物伏
望皇帝陛下曲迴睿睠俯徇微誠閔其蒲柳之衰賜以
桑榆之景俾還印紱退處田廬上以全君父始終之恩
下以安人臣止足之分帝聞延首得請是期

謝遣中使賜詔不允表

王人遠降天詔俯頒如瞻咫尺之威仰戴便蕃之寵禮
加舊物猶曲示於繫維日迫殘年顧難勝於強力重煩
使節親諭德音惟銜雨露之私更竭涓埃之報

乞致仕第三表

連年請老已屢瀆於宸聰累詔申恩尚未從於私欲荷
寵章之至厚循愚分以難安敢冒重誅復殫危懇竊以
華實既落物性必歸其根筋力或衰聖人不及以禮茲
乃天道亦惟人常伏念臣學以入官固有致君之意出

適逢世本無經國之能分珪爵不為不多被眷遇不為
不久形神弊竭齒髮凋殘數年以加八十斯至難勉從
於官政當退伏於里居伏望皇帝陛下洪造天垂至明
日照念其周旋四紀出入三朝雖無補於毫分嘗服勤
於夙夜閔茲篤老賜以殘骸則臣永荷生成之恩猶圖
隕越之報

謝遣中使賜詔不允斷來章表

訓言深厚渙發於嚴宸使傳光華俯臨於部室仍昭異

渥俾絕來辭荷睿旨之丁寧撫愚悰而震悸然人臣之義退豈忘於盡忠君父之恩老或容其謝事雖居畎畝猶在朝廷顧衰朽以無堪復滿盈之是懼分當知止久已過期終冀哀矜曲從誠請頻煩詔諭感極涕零唯誓糜捐仰酬覆育

第四劄子謝遣中使賜詔不允斷來章表

四馳使節疊奉詔書仍煩聖言復斷來請君父之恩過厚人臣之分難安仰天聽之至高懼物誠之多瀆恭承

寶訓永鏤丹衷顧潦倒於桑榆久涵濡於雨露誓知止
足可質神明冀終閔於衰殘幸早垂於俞允唯竭已疲
之力少酬下逮之仁

慰慈聖光獻太皇太后大祥表

恩厚者其服重故極於至隆痛甚者其愈遲故久而後
釋中月而禫告民有終伏惟皇帝陛下取法二儀宅憂
三祀考先王之制禮服天下之通喪誠孝兼隆情文備
至感歲時之變易履霜露而慘悽奄及祥除益深哀慕

臣限守留鑰不獲奔詣闕庭云云

又慰皇太后表

真馭不留慈顏永遠祥除奄及禪祭俯臨伏惟皇太后
殿下孝感難居哀誠罔極奉宗祧之先祀思文母之徽
音禮制有終喪期無過宸闈追慕率土同哀臣限守留
鑰不獲祇詣宮庭云云

又留司慰表

徽音如在追仙馭以無從中制有期遵聖經而俯就伏

惟皇帝陛下典禮象乎天地至行格乎神明哀慕廓然
孝誠顯若日月遄邁驚歲律之再周霜露荐臻惻宸哀
而增感臣等限以官守不獲奔詣闕廷無任云云

謝賜生日禮物表

至仁垂眷多物分頒荷寵若驚撫躬無措伏念臣材非
秀世業昧經邦夙備位於冢司寢躋榮於極品沐雲天
之澤踰分無涯依日月之光歷年斯久未遂歸休之志
猶塵居守之榮迨此周星蔑聞報政適屬始生之日復

叨行慶之私此蓋伏遇皇帝陛下厚禮優賢寶慈御極
深眷股肱之舊曲加體貌之隆俯記微生特推異數篚
盈賁帛器備精金仍蕃錫馬之恩曷追維鵜之刺纘戎
于祖慙山甫之將明受祉既多俾魯侯之燕喜載循瑣
質若蹈深淵敢不俯竭精忠仰祇休寵庶效糜捐之節
用酬覆育之仁

賀鄜延路奏米脂川大捷表

神武有征鋪敦河右王旅無敵震疊海隅亟奏膚功大

屈羣醜臣聞苗民弗率舜帝所以徂征昆夷不賓文王所以肆伐蠢茲羌虜盜彼朔方恭惟皇帝陛下稽謀自天受命于祖式遏亂畧爰整六師如飛如翰始維揚于我武于疆于理將即敘於西戎告捷九重騰歡萬寓臣限守留鑰阻預慶班瞻望闕庭無任云云

賀瀘州奏破蕩乞第巢穴班師表

鬼方負險王旅濯征燁以天威渙如水釋伏惟皇帝陛下誕敷文德載績武功撫荒服以來王冒海隅而率俾

蠢爾小丑敢扞大邦爰興采芑之師式舉渡瀘之役殲其種落靖我封疆臣限守留都阻陪慶列

再乞致仕第一表

四月十六日

請老連年詞情既竭賜詔盈篋恩禮過隆敢冒慈宸重列丹懇伏念臣自塵守鑰載越周星愈迫顏光猶居重任力不能而當止耄將及以奚為臣之所以事君必知進退之分上之所以待下貴全終始之宜俾其佚休是謂仁厚伏望皇帝陛下大明委照洪造曲成深軫衰遲

特垂開可庶託乾坤之施尚延犬馬之年偃息以觀太平優游以樂終歲雖在畎畝敢忘朝廷

謝遣中使賜詔不允表

使驛載馳有光於原隰詔函捧對如邇於威顏顧衰朽以無堪尚采收而不棄恩榮斯過志願未從重辱王人遠傳天詔誓竭涓埃之力仰酬雨露之私

乞致仕第二表

五月四日

臣近上封章願還印綬詔書俯諭天聽未回雖大君之

命當從而匹夫之志難奪期於俞允敢避瀆煩臣竊以七十致事著於禮經臣今行年七十有七昔伊尹告歸于亳周公退老於豐伊周聖賢老亦謝事況臣何人敢竊高位貪重祿而不知止乎雖聖主慈仁篤厚優寵老臣後世其謂臣何又國朝以來宰相致仕者不可悉數未聞有如臣之年而不得謝者豈先朝薄於雅故之臣乎乃所以厚之也伏望皇帝陛下閔臣衰篤察臣懇誠賜以殘年遂其夙志使之含哺鼓腹行歌放言為華胥

之民樂堯舜之世豈獨臣之幸亦足見國家忠厚安佚
老者之至於斯也陛下幸而許之臣不勝大願無任祈
天俟命激切屏營之至

謝遣中使賜詔不允斷章表

星使俯臨天言荐降恩惟求舊特昭示於優隆志切引
年尚未俞於悃悞顧循殘槁蒙被眷存雖殫螻蟻之微
誠曷報丘山之大賜

乞致仕第三表 二十四日

臣近以囊封繼上綈檢重頒雖荷渥恩未諧懇請罔避再三之瀆深懷隕越之憂庶動聽卑必期報可伏念臣受材頑薄逢世明昌甫越壯年亟躋近列任隆二府久親日月之光位冠三階何補乾坤之德自叩閤請老覲闕輸誠獲解兵符復更宮鑰俾從優佚許漸歸休瞻依松楸息偃蓬華非不知萬鍾厚祿保之足以豐家極品崇資居之惟當報國其如形神弊竭心識耗昏生亦有涯老當知止矧屬朔方用武隴右開疆使傳之所往來

川塗之所交會惟是劇繁之地必資彊敏之才使臣旅
力方剛勤勞敢憚深憂曠怠上累保全伏況陛下旰食
九重勵精庶政憲章前古董正治官百度惟新衆材並
用將責實效以趨懋功尤非老者惰偷之時鄙夫尸素
之日固當自省何待人言伏惟皇帝陛下光被四遐仁
育羣品曲迴照鑒深軫睿慈念臣自及從心請無虛歲
特加衰老許以乞身歸印紱於有司納節旄於故府優
游畎畝歌詠唐虞仰戀聖時貪延暮齒庶未填於溝壑

獲退老於丘園臣之至情實盡於此無任祈天俟命激切屏營之至

謝遣中使賜詔不允斷來章表

奏牘剖誠屢干天聽封軺繼軌三錫宸章仍煩諄誨之言俾絕後來之請荷寵榮之甚渥循涯分以難安疲駕無堪雖切君軒之戀倦飛欲息唯求枝木之依重辱使華親傳睿旨冀竭餘生之力仰酬鴻造之仁

第四劄子

六月十五日

臣近以頻上封章屢塵日月聖恩優厚眷遇曲私疊馳使軺累賜詔札雖古有勲勞於國寵數或未之聞況臣無裨補於朝耄昏何以當克下拜隕越伏思震惶臣位極三公年垂八十苟有毫分之益敢遺力於聖時既加齒髮之衰願休老於私室伏望陛下天地父母哀而許之臣緣詔旨令斷來表不敢復具章奏以煩聖聰直布懇誠仰祈報可無任惶恐俟命之至

謝四遣中使賜詔不允表

忱辭屢貢深瀆穆清溫詔俯頒重煩謨訓祇服自天之
寵曲加如地之容惟眷禮之過優顧懇祈之未遂遺簪
不棄尚蒙取采之至仁駕馬已疲曷報生成之大施

賀生皇子表

帝庭敷佑天屬挺生告慶中宸騰歡萬寓伏惟皇帝陛
下虔膺駿命寅御寶圖丕承五聖之烈光誕受三靈之
景貺宜本支之蕃衍昭福祚之熾昌獻祝堯封覩聖人
之多子作歌周室縣瓜瓞於無疆宗社降休人祇共喜

臣限司宮鑰阻覲闕廷無任瞻天望聖歡呼抃蹈激切
屏營之至

謝男及甫授吏部員外郎表

天官之屬人爵是司選授惟難寵擢非次伏念臣男及
甫早蒙慶澤獲齒仕途移孝為忠粗服義方之訓聞詩
及禮每虞牆面之譏已塵東觀之榮敢覲中臺之職伏
遇皇帝陛下更新百度登進羣材體芃棫之能官過卷
阿之求士顧惟孤族簡在清衷黃髮無堪久玷上公之

隆器愚息何算驟叨選部之華資仰銜延世之恩益勵
教忠之志儻析薪而克荷庶橫草以效勤

賀皇子

哲宗舊名

進封延安郡王表

八月

敷誥大庭推恩上嗣茲為盛典允屬昌辰臣聞周德昭
天茂本支于百世漢邦稽古建藩輔於諸侯所以對揚
祖考之休並倚親賢之助伏惟皇帝陛下穆清居位濬
哲在躬命式九圍光被四表重熙累洽繼隆列聖之基
燕翼詒謀誕受多男之慶帝庭錫祉天序飛榮仰尊宗

廟之靈宜䟽茅社之寵啓封河右遠荒西旅之區維翰
皇家永固丕天之祚瑞發之象歡震華戎凡在有生率
同大賚臣外司留鑰阻預慶班瞻望闕庭無任云云

賀皇躬痊復曲赦畿內表

九月十五日

勿藥有喜自天降康宗社殊休生靈大慶伏惟皇帝陛
下儲精蠖護受命穆清祖述憲章日慎萬微之慮欽明
文思大凝庶績之熙乙夜觀書昧爽待旦壽域既勤於
躋俗大庭微闕於怡神旋清明而復初宜福祿之亶厚

中天發號幽圉霑恩乾健離明光於海表雲行雨施惠
此京師戴湯后之寬仁歌周王之壽考臣遠違法扈外
守別都徒傾就日之誠阻預奉觴之禮與萬物而鼓舞
同四海之歡欣

謝賜生日禮物表

清衷俯記慶賚曲加祇服寵章伏增愧汗伏念臣賦材
無取竊幸何多生邁亨期久塵顯仕秉鈞宰府曾無寅
亮之功守鑰留都蔑有保釐之效榮階已極治績無聞

適當生育之辰復荷便蕃之澤此蓋伏遇皇帝陛下仁
惟求舊道在寶慈推馭福之至恩示改容之異禮惟衣
在笥錫馬既蕃仍加器幣之珍并厚龍光之渥設弧于
左劬勞之感增深拜賜於庭咫尺之威下矚顧循朽質
荐被鴻休惟竭涓埃之勤仰酬雨露之施

賀生皇子表

乙鳥祠禱天垂景貺維熊占夢神告嘉祥伏惟皇帝陛
下濬哲在躬慈仁守位保兆民而如子與萬物以為春

宜膺帝祉之休自協僉斯之慶邦家響祐海寓同歡臣
外守留都阻趨宸闕無任云云

謝獎諭表

伏蒙聖慈以臣開濬漕河了當特降敕書獎諭者明緡
俯逮華袞過榮祇荷寵私伏增愧汗伏念臣智非周物
材不兼人謬居申畫之司曾乏保釐之效惟成周之帝
宅有清洛之天津而漕運多艱舟航靡達考諸圖牒因
其故道之存相彼郊畿實有通川之便得請於上不日

而成為利雖多奏功殊寡伏遇皇帝陛下至明日照大
德天臨考實記勞不遺於微小首公成務深簡於穆清
眷言溝洫之勤亦被贊書之獎顧茲毫末豈稱褒嘉敢
忘夙夜之忠仰答聖神之遇

賀景靈宮奉安祖宗神御禮畢表

十一月

即真仙之境茂對鴻禧考列聖之宮肇稱休享靈心宴
喜熙事備成書軌所臻人祗交慶伏惟皇帝陛下睿文
天縱聖孝日躋至誠感於神明馨德格于上下眷殊庭

之盛祀仰真蔭之炳靈思覲祖宗之烈光裁成裸獻之
縉禮采漢家原廟之制放唐室太清之文闕琳殿以崇
隆合睟容而妥侑載涓吉日祇奉嚴禋儲精垂思極齋
明而合莫產祥降嘏昭福祚之無疆發大號於中天需
鴻恩於寰宇億兆蒙祉蠢息懷仁臣外守別都親逢華
旦阻預鳬趨之列徒傾岳抃之誠

又賀皇太后表

殊庭展采原廟落成真馭來迎嘉祥紛委伏惟皇太后

殿下母臨宸極婦事宗祧首風化於二南教孝恭於四海顧瞻先寢祇奉神游載嚴輦翟之儀將潔蘋藻之薦闕上真之琳闕合列聖之睟容允協帝心用成邦禮宜三靈之降祉享萬壽以無疆臣久荷國恩幸逢聖旦無任云云

范太史集卷十一

欽定四庫全書

范太史集卷十二

宋 范祖禹 撰

表 笏記附

元豐六年賀正表 以下代文潞公

伏以歷啓初正禮陳元會萬方畢賀億祉來同伏惟皇
帝陛下道冠百王化敷四表體乾坤之覆育品物不遺
並日月之照臨光明下濟春陽開泰寶祚延休臣服在
具寮歡同率土仰北辰而拱極效中嶽以獻觴

謝賜元豐六年歷日表

溫詔俯臨遠猷誕告歲將更始歷乃惟新伏惟皇帝陛下
觀象九乾宣精百度致中和而育物納仁壽以躋民
紀以日星申飭義和之職頒于方國大同正朔之文臣
祇守藩條奉宣時訓承休于下拜賜為榮

賀魏國長公主出降表

帝乙歸妹以貴而有行王姬穠華下嫁而成德人倫之
始邦國所興伏惟皇帝陛下色養慈闈恩均懿戚隆天

枝而制禮厚民俗以興仁啓魏國之大封築魯邦之外
館愛風所被率土同歡臣叨預列藩恭聞盛禮欣愉馳
戀實切愚誠臣限守留鑰不獲奔詣闕庭臣無任云云

乞致仕第一表

四月十三日

臣竊以量能而授任者人君之綱也陳力而處位者臣
子之常也能不勝任則上不可以強使力不稱位則下
不可以苟居故既老則君必賜之休不能則臣當告而
止君臣之際所以全始終之義養廉恥之風也輒殫悃

幅上瀆冕旒伏念臣累年以來拜疏請老稠疊之懇備
簡聖明陛下每降異恩未從所請歲復一歲益加耄昏
譬如日薄西山駸駸向暮俄頃可待餘光幾何重惟遭
遇累朝無補聖化高位重祿四十餘年過則生災滿將
招損豈可鐘鳴漏盡行不知休違禮經進退之文老氏
止足之戒強顏於世臣獨何心伏望皇帝陛下深惻睿
衷曲迴宸聽閔臣篤老賜以殘年臣之許國義均休戚
雖居畎畝區區之忠猶在朝廷也惟陛下幸察

謝遣中使賜詔不允表

恩輝下矚使節俯臨載跪啓於詔函若親瞻於法展仰
天威之咫尺荷聖訓之丁寧黃髮無堪尚縻留而不棄
皦日可鑒庶懇願之獲從誓畢餘生少酬洪覆

第二表

請老於朝歷年既久復煩詔旨未賜允俞雖父命子聽
當勉以順承而人欲天從必祈於迴照再三之瀆隕越
無從臣竊以禮之實者無外矯言之切者無飾詞今臣

年齒逾邁而懇請益堅陛下眷意愈隆而寵數彌厚臣雖糜隕詎可報投况臣與國家義均一體非敢仰慕前哲以辭榮肥遯為高苟有益於朝廷豈愛其犬馬之力且進而不知退者易之明戒老而必致事者禮之大經陛下縱矜而憐之未忍棄去而臣受祿已過其量引年久越其期竊意四方之人備聞累歲之請必以臣貪為誚不以臣退為疑在於聖明何所虧損俾臣冒處實有愧懷今雖免於公言後必玷於良史伏望皇帝陛下察

由衷之至懇推佚老之深仁聽解藩垣許還印綬少優
游於聖日遂偃息於田廬乃心之忠惟在王室

謝遣中使賜詔不允表

輜軒入里溫詔自天荷睿眷之優隆紆聖言之訓告載
循衰髦彌積兢榮未俯徇於懇祈仍曲加於寵數重煩
使指親諭德音唯竭涓埃之誠仰酬雨露之施

第三表

從心之年已過其八乞身之請復至於三敢罄竭於愚

誠期終迴於睿聽臣竊以自昔高賢辭祿哲士遺榮或
掛冠於都門或稱疾於家第無強勉以承命必勇果於
退身故疏廣乞骸即日不起魏舒告老舉朝莫知未有
如臣累數十章歷八九載未動凝旒之慮每紆賜札之
榮中外久聞衆庶共悉聖主之恩已極老臣之分難安
不有人言寧無鬼責伏望皇帝陛下下穆清垂聽惻隱推
慈曲成始終俾遂休佚豈敢慕遊松子退傲羲皇堯野
黎民冀獲壤歌之樂虞庠庶老猶霑惠養之仁雖居猷

畝之中敢忘天地之施

謝遣中使賜詔不允斷來章表

宸暉下燭使驛載馳囊奏屢聞瀝懇誠之切至綈封三
賜荷眷禮之優隆仍煩謨訓之言俾斷來章之請恩榮
所被啓處不遑益堅匪石之心庶動惟天之聽誓殫晚
節圖報鴻私

第四劄子

臣近以屢抗封章仰干旒宸頻蒙賜札未聽引年伏念

臣改領居留已涉三載連乞歸老于今九年豈惟罄竭於愚誠亦已多煩於睿訓况臣衰篤上簡聖明加疾疢之災生在筋力而禮廢朝夕貪於餘景視聽異於曩時豈可強整殘骸猶尸厚祿伏望皇帝陛下垂乾坤之覆育迴日月之照臨降鑒丹誠閔勞黃髮俯伏以俟俞允是期情迫於中志守不奪

賀皇子祕授山南東道節度使封儀國公表

帝庭敷命天屬啓封書軌所臻人祇同慶伏惟皇帝陛

下紹休景祚登治太寧忠厚以布淳風吉蠲以修明祀
三靈眷祐多子儲祥爰卜休辰併推異數建旄南土錫
爵上公特疏茅土之封遂荒江漢之域親賢並建蕃屏
維強盛典昭融羣生鼓舞臣外司宮鑰阻覲宸庭仰麟
趾之寶蕃詠鳧藻而載躍

賀上仁宗英宗皇帝徽號表

尊嚴祖考昭假神明祇薦隆名顯揚徽冊照臨所被鼓
舞相歡伏惟皇帝陛下天縱睿文日躋聖孝續戎下武

駿惠先猷虔宗廟之威靈荷皇穹之顧諟薦勲二后教
愛萬方丕顯丕承揚文武之謨烈不嚴不肅觀政教之
治成盛典欽崇含靈慶悅臣屬居藩守阻預班趨瞻望
闕庭無任云云

又賀皇太后表

二聖在天威靈降格太宮奉冊功烈誕章慶始宸闡歡
同海寓伏惟皇太后殿下孝嚴宗廟德庇生民恭儉以
奉先猷吉蠲以薦明祀形容盛美適駿鴻名對揚丕顯

之休昭示彌文之典教風所被黎姓咸欣臣屬西洛之
居留阻東朝之慶觀無任云云

賀四后升祔表

七月十二日

孝章皇后

孝惠皇后

淑德皇后

章懷皇后

德厚者其流光禮盛者其文縟登于先后對越宗祧鉅
典欽崇溥天欣慶伏惟皇帝陛下虔膺駿命肅奉精禋
纂隆列聖之基秩禮百王之典本生民而尊祖廣大孝
以寧神有恤閔宮載嚴於裸獻於穆清廟升合于烝嘗

報重德于坤儀刑愛風于海宇含生之品知教之隆臣
外守留都阻陪慶列無任云云

又賀皇太后表

徽音如在容典惟新四室奉祠萬方均慶伏惟皇太后
殿下宣慈母道效法坤儀薦明德之馨香達至誠於上
下瞻闕宮而仰祀嚴先后之赫靈升合宗祧增隆孝治
臣限守留鑰阻預宮庭無任云云

賀冬至表

伏以黃鍾應候南日迴躔陽德初升剛道浸長惟一人
之有慶底萬福以攸同伏惟皇帝陛下乾健統臨離明
廣照茂對時而育物大報本以事天升燎泰壇達精禋
於上帝迎釐宣室冒丕祉於羣生適當亞歲之辰永固
如山之壽臣謬塵近列親際昌期無任云云

賀皇子佶授鎮寧軍節度使封寧國公表

宸闡錫祉天序升榮盛典惟行羣生胥慶伏惟皇帝陛
下荷天眷佑濟世純熙下武繼文丕承五聖之烈詒謀

燕翼誕受多男之祥爰卜休辰特推異數建旄近屏永壯於王畿畫壤大邦用加於公袞洪枝擢秀磐石維強臣限守留都阻陪慶列無任云云

賀南郊禮畢表

祇見昊穹即郊丘而展采誕敷大號罄海寓以均禧書軌所臻人祇同慶伏惟皇帝陛下欽明稽古虔鞏臨民馨德升聞至仁丕冒損益百王之典緝熙列聖之文練日候時御羣龍而順動配天尊祖薦騂犢以昭誠上帝

居歆百神受職福祥分委禮樂備成然後迴御中天之
闡大覃率土之惠巽風鼓舞兌澤沖融塞休氣於九清
動歡聲於萬域肖翹之品茂遂惟均臣外守留都獲班
寬詔竊慶逢辰之幸阻修肆覲之儀臣無任云云

謝賜生日禮物表

宸眷俯臨天休茂對祗荷光寵伏切兢惶臣竊以朝廷
優禮近僚垂記生日特加慶賜以表渥恩示我至仁降
之遐福臣久備將相無補聖明受恩累朝拜賜三紀爰

從壯歲以及耄期豈無他人預被此賜惟臣無狀竊幸
居多器服每陳於私庭幣馬常出於天府子孫銜命閭
里生光仰惟便蕃何以報稱此蓋伏遇皇帝陛下仁如
天覆惠浹陽春紀其載育之辰厚以下流之澤日月之
照雖固間於幽遐雨露所私尚生榮於枯朽誓殫微力
少答深慈

謝男及甫賜緋表

臣某言得臣男及甫報今月九日以職事隨本曹長官

於垂拱殿奏事蒙聖恩特賜臣男及甫緋章服并詢及
老臣者文陛對揚清光俯照曲迴天睿特錫身章仍紆
顧問之私重示記存之旨伏以臣男及甫早蒙朝選獲
預郎曹曾無報稱之能遽被褒嘉之寵惟慈宸之念老
俾弱息之增榮親奉邇頤載承溫語此蓋伏遇皇帝陛
下勵精政治申飭官常收一介之微臣及二宗之末品
赤帑不稱知席寵之有因黃髮猶詢見在心之所簡哀
悰感慰私室光輝共誓靡捐仰酬覆育

賀正表

伏以天地交泰品物維新日月相推歲時更始伏惟皇
帝陛下穆清居位濬哲在躬體皇穹覆育之仁順青帝
發生之德三靈薦祉萬壽膺期臣獲齒近班親逢華旦
無任云云

辭免轉太師充兩鎮節度使致仕表

乞身之請屢瀆於清衷賜几之榮曲加於舊物推恩絕
等曠世罕儔命出非常義難虛受伏念臣素惟頑薄仰

會亨嘉無數器以兼人唯一心而許國秉均二府被遇
三朝曾無補於明時已過貪於厚祿雖誓畢生而永報
顧當陳力以無堪自及從心之年累伸乞骨之懇愚誠
備竭宸聽莫迴九載于茲四方具委天矜民而從欲聖
念老以俾休豈圖進秩維師兼榮二鎮益封并賦命作
冊書詔示殊恩併加槁質矧乃出綸溢美褒袞過優眷
禮備於始終龍光照乎今古幸蒙得謝敢玷懋官伏望
皇帝陛下特迴睿思俯鑒精懇聽輟已行之命免貽非

據之災重念臣位冠三公年垂八十載循涯分深戒滿
盈豈宜叨極品以歸田擁雙旌而就第非惟濫處實懼
疾顛願守舊官祇承明命寶藏謨訓榮示子孫言則由
衷恩期報可所蒙聖恩除臣守太師及兩鎮之命乞賜
寢罷止令臣守本官致仕仍乞貼麻處分臣無任云云

第二表

君恩佚老身則至榮天寵殊常義難苟默不遑啓處敢
避瀆煩臣竊以帝師之官人爵最極為臣及此自古幾

希矧乃並建節旄兼領方鎮惟懿親而可授非列辟之
敢當伏念臣已忝上公甫周三載今雖退老詎可復加
往者懇避殊榮嘗蒙矜允誓堅晚節敢易初心況臣常
戒滿盈素知止足公槐亢極之位豈有屢遷將鉞駢聯
之名無容虛受方當謝事曷可冒榮匪惟興朝野之譏
實懼獲神明之譴伏望皇帝陛下清衷日照洪造天垂
俯鑒精誠特追異數俾守舊秩即安故廬則臣永荷始
終之恩猶圖隕越之報

第三表

臣近以告歸得請霈澤過優繼上封章仰祈旒扆乞收
異渥祇守舊官載錫詔函未奉俞旨虔瞻寵答荐被華
褒忝冒益深震惶無所臣竊以乞骨而歸田里乃人臣
之始終安車以示子孫實儒者之榮幸固已上還於印
綬豈宜濫假於器名唯當解其所處之官致其所職之
事方且追隨野老祝頌堯封而乃寵以袞衣繡裳加之
虎符犀節在丘園而曷稱豈蓬蓽之所施一已非宜二

焉安可况臣常守止足之戒實懼滿溢之尤殊異之恩
崇隆之禮敢以死請誓於懇辭伏望皇帝陛下昭鑒危
衷特垂可報重久虛之職秩寢不世之寵光俾拙分之
少安庶餘生之未促如以臣既諧請老必欲推恩即乞
止授維師之官聽辭兩鎮之命過貪榮遇深負覲顏宸
睠下臨恐違天而有咎精誠必照特簡帝之在心期於
獲從守不可奪

謝辭免兩鎮節度批答不允表

天言俯諭宸檢載頒命出非常未從於報罷恩加無狀
益愧於便蕃誓竭精衷仰回睿聽冀慈仁之矜允俾耄
齒之保全庶畢桑榆之年少酬天地之施

辭免冊命表

呂望維師勉奉承於休命史佚作冊曷仰稱於隆榮輒
瀝悃悰重祈俞允伏念臣妨賢茲久告老獲從荷神聖
之誤恩陟宗公之極品末容懇避終愧冒居儻煩法展
之臨軒復受明庭之備禮匪惟僭越實懼顛隳伏望皇

帝陛下俯徇物誠特迴天聰罷涓辰之故事停賜冊之
盛儀庶安止足之心免招過溢之咎

謝授守太師致仕表

再加兩鎮五拜三公為臣有終舉世莫比雖獲辭於將
鉞猶祇寵於帝師受命以還撫躬無措伏念臣早塵顯
仕徒罄樸忠乏經世之遠謀屬代天之重任仁祖恭默
守道垂拱責成委秉洪鈞再登上宰英皇纂嗣聖政始
初召自外藩入長衡弼陛下大明出震盛德承祧協同

神人翊載日月極三朝之榮遇冠羣后之邇聯及茲休
退之辰重被褒嘉之典惟是父師之位首乎天秩之崇
官惟其人君豈虛授唐虞之際一二蔑聞夏商之間闕
遺靡記周則公旦繼乎呂望畢命出於康王漢唐以來
職位多闕雖或器名之假匪由勲德而居國朝唯趙普
以佐命元臣太宗特優禮舊相其後久虛此職垂及百
年夫何老臣乃忝異數此蓋伏遇皇帝陛下至仁勤施
洪造曲成總攬英髦不遺耆老委容輝於節室哀盡力

於壯途特全始終俾遂休佚極臣鄰之位號隆體貌之
寵光擊壤而歌將優游於卒歲循牆而走唯俯僂以益
恭雖居猷猷之中誓答乾坤之施

謝遣男吏部員外郎及甫賜誥命并傳聖旨宣
諭表

嘉命自天殊恩不世師垣進秩里第居榮俾愚息之言
歸備皇華而出使奉將宸澤親諭德音恭承謨訓之撫
存若對威顏之咫尺誓畢桑榆之景仰酬雨露之私

謝遣使賜詔許入覲表

王人遠降天詔俯頒眷惟耆老之臣入謝龍光之渥重
辱訓辭之厚特紆召節之嚴言不宿家仍載馳於使傳
行無俟駕將趨造於宸庭瞻周道以忘勞望堯雲而孔
邇

笏記


蒙恩特授臣守太師致仕依前開府儀同三司河東節
度使太原尹加食邑實封者進秩師垣歸榮里第禮全

終始恩許佚休顧慙衰槁之姿備極褒嘉之寵謹當身
居畎畝心在朝廷庶畢餘生上酬洪造

謝男貽慶等轉官表

恩容謝事退老家庭賞異及勞霈霑子姓莫遑懇避唯
切兢榮伏念臣早遇聖時久妨賢路過被不貲之寵每
懷知足之誠而位即臣隣方還印綬慶流宗族並襲簪
裳靜言忝冒之多敢有干祈之請雖愚誠之備列終睿
澤之靡迴典謁未能亟擢陞於近職析薪克荷咸甄叙

於榮階此蓋伏遇皇帝陛下明與日升仁如天覆眷秉
均之舊物推延世之隆恩俾私室之光輝示本朝之信
厚生馭其福既祇服於寵休仕教之忠誓共圖於報塞



范太史集卷十二

欽定四庫全書

集部

范太史集卷十三至
五

詳校官庶吉士臣何道沖

檢討_臣何思鈞覆勘

總校官進士臣楊懋珩

校對官中書臣嵇承志

謄錄監生臣秦聯登

欽定四庫全書

范太史集卷十三

宋 范祖禹 撰

奏議

論喪服儉葬疏

元豐八年六月七日

臣謹案禮喪服斬衰父傳曰為父何以斬衰也父至尊也諸侯為天子傳曰天子至尊也君傳曰君至尊也先王制禮以君服同於父皆斬衰三年蓋恐為人臣者不以父事其君此所以管乎人情也自上世以來未之有

改至漢文帝遺詔始令吏民三日羣臣三十六日而除後世又為易月之制二十四日而大祥三日禫而釋服喪紀之數尤薄於漢焉自漢以來不惟人臣無喪君之服而人君遂亦不為三年之喪惟晉武帝以疏素終三年其羣臣多以為非蓋諂諛之人習於流俗而不知禮也唐之人主無有為三年服者而三百年間議者亦未嘗及之蓋世無達禮之士而人不知事君之義也惟國朝自祖宗以來外廷雖用易月之制而宮中實行三年

之服且易月之制前世所以難改者以人君自不為服
故也今君上之服已如古典而臣下之禮猶依漢制是
以大行在殯而百官有司皆已復其故常容貌衣服無
異於行路之人無哀戚思慕之心豈人之性如此其薄
哉由上不為之制禮也夫哀麻哭泣孝子仁人之所以
表其哀也賢者無服則無以致其哀不肖者無服則遂
忽而忘之是以禮義偷薄忠孝陵遲則由無服以管其
情也素冠之詩刺不能三年蓋為是矣且其禮之失者

臣請得以悉陳之今羣臣易月而人主實行喪故十二日而小祥暮而又小祥二十四日而大祥再暮而又大祥夫練祥不可以有二也既以日為之又以月為之此禮之無據者也古者再暮而大祥中月而禫禫者祭之名也非服之色也今乃為之繆服三日然後禫此禮之不經者也既除服矣至葬而又服之蓋見梓宮不可以無服也祔廟而後即吉纔八月矣去山陵未久也而遽純吉無所不佩此又禮之無漸者也臣伏見大行皇帝

之喪自三月十三日服至二十八日而除羣臣哀麻纔
十六日遺詔易月因襲故事已行之禮不可追也臣愚
以為過山陵宜令羣臣朝服止如今日而未除哀至暮
而服之漸除其重者再暮而又服之乃釋哀其餘則君
服斯服可也此非有所難行惟存其哀麻而已今之冠
服非古之制也至於禪不必為之服惟未純吉以至於
祥然後無所不佩則三年之制畧如古矣夫哀裳不可
以服勤斷以日月而易朝服以治事誠是也然既葬而

遂除之臣竊以為太早矣孔子曰喪事不敢不勉又曰
上好禮則民莫敢不恭伏惟皇帝陛下聖政之美四方
風動上順天意下順人心書曰今王嗣厥德罔不在初
於以革千餘歲之弊正一代之禮教天下使知君臣之
義其於風化非小補也如以臣言為然乞下有司考正
其禮臣又聞儉葬者聖哲之訓也奢葬者世俗之失也
宋華元厚葬其君君子以為不臣漢世山陵多藏金寶
故有張釋之之言劉向之論世所明知也武帝在位歲

久茂陵中物無所容霍光不達大體以厚葬為愛君無
所減損從而益之故西漢之末唯霸陵猶完葬之厚薄
禍福可睹矣臣誠知國家山陵送往儉於前代然猶以
為言者欲於儉約之制損之又損使天下知其中無所
有見其中無可欲則萬世之利也臣昔者伏見仁宗皇
帝葬於昭陵有緘封皮匣納之方中者甚多皆出於禁
中人莫得而知也臣竊以為如此之類無益於先帝竊
恐沿襲故事猶或藏之推此類以損之必猶有可省者

也昔周太祖將終戒世宗曰昔吾西征見唐十八陵無
不發掘者此無它惟多藏金玉故也我死當衣以紙衣
斂以瓦棺勿作石羊虎人馬惟刻石置陵前云周天子
平生好儉約遺令用紙衣瓦棺嗣天子不敢違也汝或
吾違吾不福汝周祖生於五季之末非有前聖之識而
其葬乃如太古此其智賢於秦始皇遠矣近事不遠即
本朝所代也臣以為周祖懲唐奢葬故以儉薄矯之然
以天子之喪而幾於羸葬則太偏而不可以為繼今惟

於儉制之中加損約焉可也臣頃在書局未嘗敢越職
言朝廷得失今非職而言者竊以先帝之服臣子所同
也先帝之葬四海所共也臣身服先帝之服預先帝之
葬知其不合於禮而不言憂其或過於厚而不以告臣
所不能已也臣嘗采唐事為唐鑑數百篇欲獻之先帝
屬先帝不豫未及上其中一篇論厚葬一篇論喪服輒
不自揆謹錄上進庶幾觀古以知今少裨萬一焉干冒
疏宸臣無任惶懼俟罪之至

唐鑑二篇

太宗

正觀十一年二月帝自為終制初文德皇后疾篤言於帝曰妾生無益於人不可以死害人願勿以邱壟勞費天下因山為墳器用瓦木而已及葬帝復為文刻之石稱皇后節儉遺言薄葬以為盜賊之心止求珍貨既無珍貨復何所求朕之本志亦復如此王者以天下為家何必物在陵中乃為已有今因九峻山為陵鑿石之工

纔百餘人數十日而畢不藏金玉人馬器皿皆用土木
形具而已庶幾姦盜息心存沒無累當使百世子孫奉
以為法至是帝以漢世豫作山陵免子孫倉猝勞費又
志在儉葬恐子孫從俗奢靡於是自為終制因山為陵
容棺而已

臣祖禹曰厚葬之禍古今之所明知也夫藏金玉
於山陵是為大盜積而標示其處也豈不殆哉是
以自漢以來無不發之陵後之人主知其有害無

益而姑為之以賈禍迹相接而莫之或戒也太宗雖為終制以戒子孫而昭陵之葬亦不為儉及唐之末不免暴露之患豈非高宗之過乎

高宗

永徽元年正月太宗女衡山公主應適長孫氏有司以為服既公除欲以今秋成昏于志寧上言漢文立制本為天下百姓公主服本斬衰縱使服隨例除豈可情隨例改請俟三年畢成昏帝從之

臣祖禹曰書曰三載四海遏密八音君喪三年自古以來未之有改也漢文率情變禮薄於喪紀始令吏民三日羣臣三十六日釋服雖欲自損以便人而不知風俗實自此壞也自是以後民不知戴君之義而嗣君遂亦不為三年之服唐之人主鮮能謹於禮者故有公除而議昏亮陰而舉樂內無父子外無君臣而欲教化行禮俗成難矣夫君者父道也臣者子道也無君是無父也况人君而可

以無父乎若君服於內臣除於外是有父子無君
臣也為國家者必務革漢文之薄制遵三代之隆
禮教天下以方喪三年則衆著於君臣之義矣

再論喪服疏

七月九日

臣前上疏論大行皇帝喪服乞令羣臣依典禮三年之
制臣之愚見以為過山陵雖易朝服宜存其哀麻而服
乘之飾止如今日至暮年而漸變之以至於祥禫然後
全吉此非有所難行惟令有司考正之而已今已卒哭

山陵有期喪服事重道之隆汙俗之厚薄繫焉不可不早裁定也國家承平百有餘年列聖欽明動循典禮人倫之正朝廷之治考之前世自三代以後未之有也惟是喪服猶依漢制遂使臣居君喪情禮至薄後世或謂本朝無一違禮之士臣竊惜之且在禮臣子一也今君服於上臣除於下是有父子而未有君臣也天子者天下之共主也故其喪使天下共服之臣伏見朔望之禮羣臣朝服以造於先帝之殯宮是以吉服臨喪也而人

主獨以衰服在上下異禮是以先帝之服為人主之私喪也以吉服臨喪以先帝之服為人主之私喪此皆禮之不安者也臣前所言君服斯服者竊以為君臣當同服也伏惟祖宗以來此禮未改者蓋喪事常出於倉猝而有司惟舉故事因襲而行無所損益焉今欲風天下以忠孝使民德歸厚莫若先正此禮則衆庶曉然明於君臣之義矣夫居喪之禮衰麻本不可以去身然而朝廷之上異於私家故古者君臣居喪而行吉禮則釋

哀而服冕既終禮則釋冕而服衰今人君素服以聽朝
羣臣素服以治事蓋亦古之遺法也臣愚以為羣臣燕
服亦宜為之制度以齊之吉禮則朝服與燕服皆吉凶
禮則朝服與燕服皆凶居喪朝服所以從宜也而燕服
有紅紫之飾則何以異於無服者乎聖人所以制服者
使民見其服而哀不忘於心也必使之脫去朝服而猶以
有喪者自處則人情不可得而忘矣暮年之內燕服宜
純縞素至小祥而漸變之古者練衣黃裏縗緣此練之

服也既小祥則燕服亦可以有色而服乘之飾漸加以
緣可也書曰三載四海遏密八音古者禮不下庶人惟
遏密三年所以為君服也詩曰溥天之下莫非王土率
土之濱莫非王臣然則民亦臣也今祔廟以後惟羣臣
不舉樂而四海之內萬民得以作樂焉此所以不知戴
君之重也臣愚以為宜禁民舉樂三年竊惟朝廷所以
不循遏密之制者蓋不欲使天下之民三年不樂而為
樂工者所在有之恐其失業故寧殺禮以便民也臣以

為凡天下之為俗樂者率皆游民非良農也使之廢業
三年乃所以教之使知為君之有服也彼不為樂必有
他業以養其生未必至於困窮也今殺禮以姑息之是
使人不知君臣之義也故臣以為禁之合於禮而無傷
於俗足以厚天下之情夫為國家者以禮為急不可忽
也伏望陛下幸察斷之以禮而勿疑

貼黃乞并臣前疏降附尚書省

進唐鑑表

元祐元年二月二十八日

臣竊以自昔下之戒上臣之戒君必以古驗今以前示
後禹益之於舜則言其所無于佚于樂傲虐之作防於
未然周召之於成王則相古先民歷年墜命日陳於前
皆所以進哲德而養聖功也臣某誠惶誠懼頓首頓首
臣昔在先朝承乏書局典司載籍實董有唐嘗于紬次
之餘稽其成敗之迹折以義理緝成一書思與庶人傳
言百工執藝獻之先帝庶補萬分比臣赴職不幸先帝
洎頻被冕遽迫登遐追攀莫及抱恨沒世伏遇皇帝陛

下嗣膺大統睿智日躋詳延耆儒啓迪聖學監於前代
宜莫如唐儀刑祖宗之典則四方承式萬世永賴臣之
此書雖不足以發揮德業廣助聰明拳拳之忠不能自
已苟有所得不敢不告輒以狂愚塵玷日月罪當誅死
伏惟清閒之燕少賜省覽其唐鑑十二卷繕寫成六冊
謹隨表上進以聞

又上太皇太后表

臣聞觀古所以知今彰往所以察來唐於本朝如夏之

於商商之於周也厥監不遠著而易見臣頃在書局多
歷年所不勤而祿無補聖世神宗皇帝明燭幽遠一物
不遺特垂誤恩擢實秘省臣比及赴職不幸先帝違豫
遽棄羣臣不獲一覩清光螻蟻之志無所復伸臣嘗於
職事之餘討論唐史撫其行事緝成一書妄以私意而
發明之可以稽參得失監觀成敗伏遇太皇太后陛下
母臨萬國天覆羣生酌於民言以美聖政臣區區之忠
既無及於先帝思報之於陛下是以冒昧自竭不敢隱

默古者史為書瞽為詩百工獻藝庶人傳語思不出職
交修於上冀以塵露仰裨崇深臣職文史敢忘斯義竊
惟治亂興廢皆起細微言之於已然不若防之於未然
慮之於未有不若視之於既有故曰前事之不忘後事
之師也其唐鑑十二卷繕寫成六冊謹隨表上進以聞

上太皇太后乞崇儉戒奢疏

二年四月四日

臣濫備勸講夙夜思職愚慮所及不敢不言伏以自先
帝厭代諒闇三年今祥禪將終即吉方始服御器用內

外一新奢儉之端皆自此始臣愚以為珠璣金玉之飾
錦繡纂組之工凡可以蕩心悅目者不宜有加於舊增
多於前也皇帝方嚮儒術親學問審質曰長聖性未定
覩儉則儉覩奢則奢陛下所以訓導聖德者宜動皆有
法不可不慎也古之聖帝明王莫不以儉為美德侈為
大惡帝堯所居之室土堦三尺茅茨不翦舜稱禹曰克
勤于邦克儉于家孔子曰禹吾無間然矣菲飲食而致
孝乎鬼神惡衣服而致美乎黻冕黻冕祭服也伊尹曰

慎乃儉德惟懷永圖言儉之可以長久也文王卑服即
康功田功周公戒成王以先知稼穡之艱難凡此皆陛
下所宜日以啓迪皇帝之志者也東漢明德馬皇后常
服大練左右但衣布帛無香薰之飾欲以身率下前史
以為美談臣竊惟陛下聖政度越前古必不使明德馬
后專美漢朝若崇儉敦樸飭正後宮以輔養皇帝之德
使目不視靡曼之色耳不聽淫哇之音非禮不言非禮
不動則學問日益聖德日隆此宗社無疆之福也孔子

曰少成若天性習慣如自然老子曰不見可欲使心不亂古語有之曰貴不與驕期而驕自生富不與奢期而奢自至夫少習儉約長猶侈靡少習侈靡長將若何今天下之大生民之衆繫在陛下陛下儉於上則百姓富於下陛下奢於上則百姓貧於下比年以來天災流行年穀不熟國用虛乏百姓困敝幸賴陛下勤恤民隱存養休息視之如子有所不便輒弛禁以利民民方有樂生之意小康之望當今之務宜痛為節約昭示儉樸以

率天下自古為國未有不先儉而能致四海富實者也
漢文帝身衣弋綈慎夫人衣不曳地帷帳不得文繡以
示敦樸為天下先景帝遵業務農訓儉以雕文刻鏤傷
農事錦繡纂組害女紅下詔戒之故太倉之粟陳陳相
因紅腐而不可食都內之錢貫朽而不可校稱賢君必
曰文景以比周之成康及其衰微民心思漢而不能忘
以文景恭儉德澤及民者深也臣願陛下上觀帝堯舜
禹文王之法考伊尹周公孔子之言下視文景之效則

皇帝少而習之長而安之唯知儉約不知侈靡他日海內富庶自今日儉德為之始生民之類受陛下之賜豈有窮極哉臣竊聞奉宸庫已取珠子至六十斤戶部已用金至三千六百兩不為不多矣臣所以先事而言者恐增加無已滋長侈心也唐太宗問褚遂良曰舜造漆器禹雕其俎諫者十餘人何也遂良對曰奢靡之始危亡之漸也漆器不已必金為之金器不已必玉為之古之爭臣必諫其漸若事已橫流則無所諫矣是以紂為

象筭箕子嘆曰為象筭必為玉杯為玉杯則思遠方珍怪之物而御之矣興馬宮室之漸自此始不可振也古之人見微而防患如此唐明皇開元之初悉取珠玉錦繡服玩之物焚之於庭以示儉德及其末年猶以窮極奢侈天下敗亂今臣區區之愚竊以皇帝即吉之始若一開侈靡之端恐後日奢費之無已也故願豫為之防止於未然臣愚不識忌諱唯陛下裁赦

范太史集卷十三